

書名 西湖遊覽志二十四卷 嘉靖二十六年序刊萬曆十二年序江陰范鳴謙修本
撰者 明 田汝成 撰
卷 卷十三
內容分類 史·地理·名勝·浙江
索書號 倉石20405
編號 2037500

卷十三

彩色首頁1

[東洋文化研究所漢籍目錄 編號: 2037500](#)

[東洋文化研究所漢籍目錄所藏漢籍善本文影像資料庫 索書號: 倉石20405](#)

[漢籍善本文影像資料庫文本 西湖遊覽志二十四卷 嘉靖二十六年序刊萬曆十二年序江](#)

[陰范鳴謙修本](#)

[版權所有: 東京大學 東洋文化研究所](#)

[使用上的注意事項](#)

西湖遊覽志第一卷

西湖總叙

錢唐田 汝成 輯撰

西湖故明聖湖也周繞三十里三面環山谿谷縷注
下生淵泉百道瀦而為湖漢時金牛見湖中人言明
聖遂稱明聖湖以其介于錢唐也又稱錢唐湖
以輪委于下湖也又稱上湖以其負郭而西也故
稱云西湖諸山之脉皆宗天目天目西去府治
十里高三千九百丈周廣五百五十里蜿蜒
深拔峭舒岡布麓若翔若舞萃于錢唐而嶺

澄泉迸出其偏人人無不以手加額嘉神既也商所以顏之忽得古殘軌方二寸許上有安寧萬姓四字細視大類蘇長公筆法其神所以加惠垂庶而錫之耶亦奇矣遂不敢易而書之顯靈古廢輓上印陽文安寧萬姓四字存廟相傳以昭威庇

西湖遊覽志第十二卷終

西湖遊覽志第十三卷

錢唐田汝成輯撰

南山分脉城內勝蹟

城闥

鳳山門候潮門永昌門清泰門慶春門良山門湧金門

鳳山門在城南與北關門對俗稱正陽門又東南二里許宋有嘉會門南近鳳皇山爲禁垣北闕有和寧門入和寧門透大內直南有麗正門杭州城垣創于隋楊素者周廣三十六里有奇廣

于錢鏐者七十里元時禁天下修城以示一統而內外城隍日為居民所平至正十六年張士誠陷姑蘇據浙西五郡十九年發松江嘉興湖州杭州民夫復築焉晝夜併工三月而完城周六千四百丈有奇高三丈厚視高加一丈而殺其上得厚四之三焉舊城包山距河故南北長時則自艮山門至清泰門以東視舊則拓開三里而絡市河于內自候潮門以西則縮入三里而截鳳山于外禮部尚書貢師泰為之記明興遣曹國公李文忠將兵取杭州守將潘元明

納欵城隍皆如元舊○宋時和寧門內有學士院院內有王堂摛文堂王仲衡詩云王堂晝永暑風微簌簌飛花落小池徙倚幽欄憑問訊夏鷺飛出萬年枝

候潮門在城東而近南宋時有便門保安門今廢永昌門在城東宋名新門俗稱草橋門

清泰門在城東宋名崇新門俗稱薦橋門又稱螺

螭門

慶春門在城東俗稱菜市門門之左

宋有皇城安泉水甚佳

艮山門在城東而近北俗稱壩子門艮山者南山之盡脉也高不踰尋丈今已陵夷莫可指索沿城五六里漫為平土沃疇腴禾菽芄茂蓋餘氣之散衍耳

湧金門吳越王建門內有湧金池金華令曹杲所鑿也

衢巷河橋

入鳳山門而北至鎮海樓其街之東為雲錦橋羲和坊義井巷集義巷通江橋懷信坊西為仁孝坊壽域坊天慶坊保民坊長慶坊

雲錦橋宋稱六部橋東通候潮門大河之水自龍

山間入鳳山水門從南而北首過此橋次安和

橋黑橋州橋通江橋會茆山河次望仙橋新宮

橋會小河次三聖橋佑聖橋榮府橋柴塚橋積

善橋清泰橋豐樂橋油局橋惠濟橋僊林橋登

雲橋梅家橋折而西次通濟橋葛家橋天水院

橋出武林水門洗馬橋抵德勝壩官商馳騫舳

艦相銜晝夜不絕○六部橋之對宋有六部部

各有尚書侍郎郎中員外郎凡二十四司吏部掌文武官吏選試擬注資任遷敘蔭補考課之

政封爵策勳賞罰殿最之法其屬四曰尚左尚
右侍左侍右曰司封曰司勳曰考功戶部掌人
戶土地錢穀之政貢賦征役之事其屬四曰左
曹右曹曰度支曰倉部曰金部禮部掌禮樂祭
祀朝會宴饗學校貢舉之政其屬四曰儀部曰
祠部曰主客曰膳部兵部掌儀仗函簿武舉民
兵廂軍士軍蕃軍四夷官封承襲之政輿馬器
械之數土地城隍堡塞烽燧之圖籍其屬四曰
兵部曰職方曰駕部曰庫部刑部掌刑法獄訟
奏讞赦宥敘復之政敕律章程之式其屬四曰

刑部曰都官曰比部曰司門工部掌城郭官室
舟車器械符印錢幣山澤苑囿河渠之政營繕
飭化之法其屬四曰工部曰屯田曰虞部曰水
部其六部監門紀部官卯未之出入病疾之暫
告與謁制之可否署在大門之內○又址爲尚
書省中書省門下省樞密院宋初門下省設官
十有一侍中侍郎左散騎常侍各一人給事中
四人左諫議大夫起居郎左司諫左正言各一
人中書省設官十有一中書令侍郎右散騎常
侍各一人舍人四人右諫議大夫起居四人右

司諫右正言各一人尚書省設官九尚書令左
右僕射左右丞左右司郎中員外郎各一人其
屬六部蓋三省長官加平章政事者皆宰相職
也初時別置中書于禁中與樞密使對政謂之
兩府事關中書者中書宣奉門下省審覆付尚
書省施行事關樞密者樞密宣奉門下省審覆
付帥府施行尚書門下雖尊官不得參襄密勿
故中書之權特重熙寧改制以待中中書令尚
書令官高不除而以左僕射兼門下侍郎行侍
中之職右僕射兼中書侍郎行中書令之職建

炎初以左右僕射並加同中書門下平章事侍
郎改參知政事而三省合為一體乾道間改左
右僕射為左右丞相至是三省之名雖存而官
非初制矣樞密院掌軍國機務兵防邊備戎馬
之政招募閱試遷補屯戍賞罰之事設官十樞
密使知院事同知院事樞密副使簽書院事同
簽書院事都承旨副都承旨檢詳編脩而樞密
使類以宰相兼之自簽書已上皆謂執政中為
都堂為兩府會議之所刻周官一篇於正坐之
屏堂中刻累朝詔勅文劄各有跋語自諫議大

夫而下別爲諫院省院監門封樁安邊所俱在大門之內

義和坊東通安和橋東有勝安倉卽聖安寺故址寺元貞二年建至正間毀爲軍器庫今爲倉基義井巷東通黑橋

集義巷東通州橋宋時與玉牒所貴恕坊對東有預備倉

通江橋本名慶元橋其東宋有都茶場雜買務權貨務雄武營北爲太醫局又東爲保安門今塞橋之南爲過軍橋北爲鄉義巷東爲三皇倉舊

爲三皇廟

懷信坊俗稱糍糲巷與長慶坊對近朝天門而東至望僊橋者其北宋有裕民坊

仁孝坊俗稱清平巷西通清平山開元寺者其對宋有登平坊

壽域坊在白馬廟南西通七寶出山側宋韓侂胄第第近太廟鑿山爲園僭擬宮禁引青衣泉注于闕古堂秀石環繞絕類香林冷泉之景有柳坡十二級夜宴則殿巖用紅燈數百出于柳坡之後以燭之其巖洞最勝者曰雲岫危峰隱石

淺灣深沼窈窕淳泓自比于洞天福地云

天慶坊宋稱太廟巷俗稱蘭子坊巷宋有大宗正司以叙族姓昭穆治其家政其南有玉牒所宗正寺元時有權茶提舉司

保民坊卽城隍廟街西通金地山宋有司農寺太府寺將作監軍器監諸司諸軍審計司○司農寺隸戶部以幾察廩庾之出納少卿張維記云漢置九卿大司農其一也今倣周制爲六部以戶部掌國計而司農猶爲列卿贅矣況倉儲出納自昔太倉令主之蓋大司農之屬猶今之倉

部也以列卿而行太倉令口惟倉部要束是聽位雖尊勢出倉部下至于軍餉肅給罷于奔命世謂走卿辱矣○太府寺掌軍國之經費與縣官之私養奉輓幣定權量沿鹽茗之劑劑班內外之廩稍覆具各數而鈎磨之頒財用于受藏之府周知入出斤幣餘互市之積以便貿易比物奠價俾從其抵儲藥物以除札瘥叙財幣以待上之賜好制券以通商賈○將作監掌營繕之事行都工作多以京尹畿漕分任之故監官多闕員允臺省之文次與郡邑之有聲者寄徑

於此號儲才之地○軍器監掌繕諸軍器械其御前所用者別有提轄歸之殿司○諸司諸軍審計司分爲二局各乘財用稍食之數而會稽之屬太府寺

長慶坊俗稱石龜巷西通石佛山宋有都奏進院卽智果院舊址也掌王言出納與四方章疏其南爲三執政府乃宰相私第也內有四眼井鎮海樓舊名朝天門吳越王錢氏建規石爲門上架危樓樓基疊石高四仞有四尺東西五十六步南北半之中爲通道楹架交梁承以藻井牙

柱壁立三十有四東西閔門對闕名曰武臺夷敞可容兵士百許臺臺左右北轉登石級兩曲達于樓上樓之高六仞有四尺連基而會十有一仞貯鼓鐘以司漏刻元至正間平章康里慶童改爲拱北樓 皇朝洪武八年行省劉王兩叅政者失其名改爲來遠樓旣榜揭遣拆字人張乘槎者往視之槎曰三日內主哀喪之事如期王毋死劉以曆日紙坐法王延乘槎問故對曰來帶喪形遠從哀帶哀形旁之兩點相續者淚形也頃之叅政徐本改爲鎮海樓詹孟舉署

扁其陰篆書吳山偉觀四字成化十年燬明年
重建疊構三層闌楯周繞巨鍾護鼓左右懸架
更嚴之夕鼓鑿角咽接箭行籌似落霄漢間規
制弘遠矣○趙子昂同慶童丞相上拱北樓詩
云城上高樓接太霞令嚴鐘鼓寂無嘩提疆內
向三千里比屋同封百萬家心在江湖存魏闕
身隨牛斗泛僛榘舉頭便覺長安近時倚闌干
望日華○楊仲弘詩云殿地鼓鼙迎日出倚天
梁棟傍雲浮北瞻帝闕三千里南控臣藩二百
州江海無波沉罔象旌旗垂野駐貔貅鸞迴廩

光

榜多深意繡袞于今有魏牟○高得暘詩天府
南來第一州胥丘東起最高樓水分兩泖趨都
會地接三吳控上游雲外鼓鼙嚴夜禁城中車
蓋樂春遊玉堂政暇新題扁彩筆飛髯射斗牛
自鎮海樓而北至清河坊其街之東折而北爲布市
巷沙皮巷正東爲興禮坊西爲吳山坊融和坊清河
坊

布市巷宋時爲賣布之所東通望德橋
沙皮巷舊名清平坊宋時酒館也至今沽肆不徹
興禮坊西與清河坊對東通新宮橋

吳山坊內有大井周四丈吳越時韶國師所鑿品其水爲錢唐第一蓋山脉融液獨源所鍾不雜江湖之水泓深瑩潔異乎衆泉宋淳祐丁未大旱城井皆涸獨此井日下萬縷不減不盈都人神之安撫趙與簋立祠其畔洪丞初參政徐本立石刻吳山第一泉五字紀宋事于碑陰內有金銀雜色灸長數尺者或隱或顯相傳來自井底泉眼中者

融和坊宋稱灌肺新街內有灌肺嶺

清河坊與興禮坊對宋有張循王俊賜第在焉俊

封清河郡王故稱清河坊今改旬宣街

自興禮坊而北至賢福坊爲灌肺巷通和坊曾濟巷寶佑坊五間樓自清河坊而北至文錦坊爲太平坊惠民坊巾子巷中瓦巷甘澤坊

灌肺巷西與融和坊對內有灌肺橋宋爲珠子市通和坊東通金波橋宋有花月樓又東爲熙春樓南瓦子又南爲抱劍營漆器墻沙皮巷融和坊其西爲太平坊巾子巷獅子巷皆爲瓦市各有等等酒客登門則有提甌獻茗者謂之點花茶登樓甫飲一杯則先與數貫謂之支酒然後呼

喚提賣趨趨祇應者亦皆紛至澤費頗多妓家
富者酒器沙鑼冰盆火箱粧盒之類悉以金銀
爲之帳幔裊禪多用錦綺器玩珍奇他物稱是
下此者亦競尚鮮華自酒器首飾被臥衣服之
屬各有貨者

普濟巷東通普濟橋又東爲柳翠井在宋爲抱劍
營地相傳紹興間柳宣教者尹臨安履任之日
水月寺僧玉通不赴庭叅宣教憾之計遣妓女
吳紅蓮詭以迷道詣寺投宿誘之淫媾玉通修
行五十二年矣戒律凝重初甚拒之至夜分不

勝駘蕩遂與通焉已而詢知京尹所賺也慚恹
而死恚曰吾必敗汝門風宣教尋亡而遺腹產
柳翠坐蓐之夕母夢一僧入戶曰我玉通也旣
而家事零落流寓臨安居抱劍營柳翠色絕藝
倫遂隸樂籍然好佛汰喜施與造橋萬松嶺下
名柳翠橋鑿井管中名柳翠井父之臯亭山顯
孝寺僧清了謂淨慈寺僧如晦曰老通墮落風
塵久矣盍徑度之如晦乃以化緣詣柳翠爲陳
因果事柳翠幡然萌出家之想如晦乃引見清
了清了爲說佛法奧旨及本來面目未且厲聲

日二十八年烟花業障尚爾耽迷耶柳翠言下
大悟疑即謝銜華絕賓客沐浴而端化歸骨臯
亭山從所度世

寶祐坊東通寶祐橋其南宋時有榮王府看街樓
五間樓在亭橋東與三元樓對宋時民間市樓之
有名者曰三元曰五間曰熙春曰賞心曰花月
日日新其厨店分沽則有嚴厨翁厨任厨陳厨
周厨沈厨鄭厨康沈銀杓等店每樓各分小閣
十餘器皆銀飾各有私名妓數十輩凭檻招邀
謂之賣客又有小影裝不呼自至歌吟強聒以求

支分謂之擦坐有吹簫彈阮息氣鑼板歌唱散
耍等人謂之趕趣有老嫗以小爐炷香爲供者
謂之香婆有以法製青皮杏仁半夏確砂荳蔻
小蠟茶香藥韻薑砌香橄欖薄苛至酒閣分俵
得錢謂之撒嚙有賣玉面狸鹿肉糟決明糟蟹
糟羊蹄酒蛤蜊柔魚鰕茸鱉乾者謂之家風有
賣酒浸江蛭童舉礪肉龜脚鎖管密丁脆螺釐
醬法鰕子魚蟹魚諸海味者謂之醒酒口味凡
下酒羹湯任意索喚雖十客各欲一味亦自不
妨過賣鑄頭記憶數十百品傳唱如流卽時供

應酒未至則先設看菜數碟及舉杯則又喚細菜如此屢易愈出愈奇歌管歡笑之聲每夕達旦徃徃與朝天車馬相接雖暑雨風雪不少減也

賢福坊一名東文錦坊俗稱壩東巷舊傳江湖至此有壩限之東通平津橋俗稱貓兒橋

太平坊東與通和坊對

惠民坊洪武十七年吳昆醫學于此

巾子巷舊名市南坊

翔宮

甘澤坊與寶祐坊對

文錦坊西通三橋街者俗稱洋壩頭

自賢福坊而北至義和坊為安平巷永清巷日新巷自文錦坊而北至壽安坊為連二巷修義坊富樂坊

鼠樂坊教睦坊泰和樓積善坊秀義坊

安平坊東通方便橋

永清巷舊名蘭陵坊俗稱水巷東通永清橋

日新巷宋有日新樓東通日新橋

義和坊西與壽安坊對東通芳潤橋

連二巷宋有連二巷坊

脩義坊俗稱肉市巷又稱姜椒巷西通軍將橋
富樂坊俗稱賣馬巷內有狗兒嶺今夷爲平路
最樂坊舊名衆樂坊俗稱虎跑巷後通大瓦子亦
曰上瓦宋時瓦子有名者十有三在城則南瓦
中瓦上瓦下瓦蒲橋瓦城外則便門瓦候潮門
瓦小偃瓦新門瓦薦橋瓦菜市瓦錢湖瓦赤山
瓦舊瓦嘉惠瓦新瓦艮山瓦羊坊橋瓦王家橋
瓦龍山瓦皆群花所聚蓋取聚則瓦合散則瓦
解之義也

教睦坊一名敦睦巷其南宋有銀甕酒庫

泰和樓宋時城中官沽有八樓曰和樂曰和豐曰
中和曰春風曰泰和曰西樓曰太平曰豐樂皆
屬戶部點檢所樓各有庫每庫祇直數人官妓
數十人飲客登樓則以名牌點喚侑觴謂之點
花牌金銀器皿取自庫中往往學舍士夫所據
外人未易登也

積善坊俗稱上百戲巷西通施水坊橋內有幢子
巷

秀義坊俗稱下百戲巷內有東平王廟

壽安坊俗稱官巷又稱冠巷宋時謂之花市亦曰
花園蓋汴京有壽安山山下多花園春時賞燕
爭華競靡錦簇繡圍移都後以花市北之故稱
壽安坊

自壽安坊而北至象安橋其街之東爲武志坊戒民
坊新安坊西爲忠孝坊脩文坊里仁坊保信坊定民
坊百福巷彌教坊十官宅巷棗木巷資福巷下瓦巷
武志坊東通李博士橋

戒民坊東通棚橋宋爲行刑地故號鬼門關又曰
陰山道入巷過棚橋宋時謂之棚樓粧點勾欄

之所其對爲中和樓乃銀甕中庫元時平準庫
在焉

新安坊俗稱新安橋巷有千勝將軍廟

忠孝巷俗稱崔家巷

脩文坊西通洪福橋宋有將作監

里仁坊西通鞞鼓橋宋稱陶家巷

保信坊俗稱剪刀股巷

定民坊與戒民坊對俗稱中棚巷舊有棚心寺佛
牙塔雙井

百福巷舊有百福院唐天福中錢氏建于城外乾

道五年徙棚橋至正間燬

弼教坊俗稱狗兒山巷宋名睦親坊今有睦親井尚存有宗學在焉先是宋分宗子爲六宅宅各有學南渡後惟置睦親一宅紹興四年始置諸王宮大小學嘉定九年改宮學爲宗學凡曳籍王牒者無間親踈皆肄業焉三年一試如太學法有明倫立教汲古等堂賈仁立愛大雅明賢懷德升俊等齋自此而西街之南爲蕭相國祠又西爲金鉤巷街之北爲新慶巷北通匾擔嶺隱隱起伏蓋南山之畫脉也又西爲花園巷又

西爲洗麩橋

十官宅巷宋時有宗室之子十人居此故名

棗木巷西通石湖橋宋時范成大所居號石湖故名其北爲結縛橋相傳宋時下尾勾欄觀者雲集時馬光祖尹京令行禁止得遺物者結縛于此以待失者故名其東爲匾擔嶺宋爲沂王府下尾巷亦曰北尾內有勾欄十三座北有尾子橋舊名衆樂橋

自興禮坊而東至舊達達城其街之南爲沙皮巷布市巷過新宮橋爲夾墻巷北爲熙春橋街清冷橋街

鍾公橋街佑聖觀街

新宮橋俗稱宗陽宮橋小河之水自新宮橋分派從東而西過鍾公橋清冷橋折而北過熙春橋灌肺橋金波橋普濟橋保祐橋巧兒橋亭橋舍人橋方便橋末清橋日新橋芳潤橋李博士橋棚橋新安橋度生橋北橋軍頭司橋清遠橋百萬倉橋折而東與大河合流出武林水門俗稱市河是也其支派自觀橋而西合清湖河以北亦曰市河

夾墻巷宋時德壽宮墻外委巷也

熙春橋宋有熙春樓南瓦子

清冷橋南通沙皮巷北通漆器墻

鍾公橋通上下抱劍營本名寶劍營錢王屯軍之所又北通集慶巷

佑聖觀街自宗陽宮折而北東為巡鹽察院北為市船司佑聖觀之東為武林驛西為錢唐學水亭子

自清河坊而西至杭州府治其街之南為康裕坊吳山坊大隱坊安榮坊懷慶坊豐和坊龍舌頭北為南新街清望街德化街十三灣巷泰和坊天井坊文明

坊

康裕坊俗呼八作司巷宋有御史臺中爲臺廳謂之朝堂有御史閣位廳以內爲西監察位又內爲殿中位又內爲中丞侍御史位臺獄之門扁曰四推南渡鮮置對有屬臺官讞問者則刑察就聽於大理之獄

吳山坊直北與後市街對內有報恩寺

大隱坊一名小僊巷宋徽宗時有處士徐與居此徵辟不起賜號冲晦先生

安榮坊上通金地山直北與華光巷對

懷慶坊由此以登寶月山者

豐和坊近龍舌頭可通清波門者在天井坊對

龍舌頭蓋當寶月蛾眉兩山之際蜿蜒而來若龍舌之吐者

南新街內有憐忠祠

清聖街舊名新街卽後市街

德化坊舊有仁和衛

十三灣巷分東中西三道內有惠安寺

泰和坊俗稱華光巷亦稱糯米倉巷

天井坊在布政司右舊名通湖坊今廢其對山有

天井按臨安舊志所載城中之井自相國而下有名者六十自吳山而下有名者三十有一初無天井之名獨於黑龍潭云在寶月山一名天井山天晴則潭水碧色有雨則先期變黑蓋指黑龍潭為天井也嘉泰二年清河坊大火郡守丁常任行視火場得潭井于御史臺西小巷中深五十餘尺廣十餘尺淘甃清潔甘泉迸盈得建炎錢數十枚其堙塞必在建炎後也

文剛坊即中和坊亦名淨因坊闢兒頭從此而北宋為樓店務又北為戒子橋元為燒鈔庫今為

黃冊庫又北為定安橋宋有慈幼局施藥局○慈幼局淳祐七年建凡民間遺棄小兒有願收養者月支錢一貫米三斗二歲乃止無人收養者官為顧乳有願子者從官請之○施藥局淳祐八年建元時改為醫學提舉司今併入都指揮使司

杭州府前為宣化橋其對為仁美坊安阜坊其西為流福坊

宣化橋宋時俗稱楔來橋至今仍之謂好訟者與作惡而被刑者至此實有悔心也

仁美坊俗稱若板巷宋時有三通判衙又東為水溝巷

安阜坊舊名近民坊從此而南有淨因塔俗稱塔兒頭

流福坊在府西水口透城外引湖水從西而東經府前至文明坊折而北過戒子橋定安橋凌雲橋福寧橋轉運橋入湧金池之水余水口雖淤而餘脉猶可考也蓋宋已前自錢湖門至錢唐門引湖水入城者為明溝五道暗溝十五道明溝者一為清波閘即流福水是也二為湧金閘

即湧金池是也三為集賢亭水篔四為集賢亭後閘今成化間所導經蓮花橋出曲阜橋者是也五為菩提寺閘暗溝者李泌所開六井沈文通所開南井蘇軾所開新溝通貓兒橋及雄武營者而布政司前日獅地西通西湖東出水於普濟橋又仁和學府學前亦有暗溝繞樞星門出於凌雲橋者是也餘不可考夫久廢者固不可復矣有踪跡可尋而坐視堙梗非郡城之利也

後市街宋時為柅子圍有龍翔宮孟太后宅李皇



后宅全皇后宅六眼井直南與吳山坊對先是
宋時車駕朝饗景靈宮由御街過朝天門經中
瓦前直下回則自洋壩頭橫入龍翔宮自太平
坊出御街寶祐癸丑十二月大火遂從御街當
中取大路直入中瓦之右以爲武林園其左以
爲皇子忠王望湖樓其時旅邸有題壁云龍翔
宮闕壯皇都鑿路縈迴枉德車天意也知明主
意故教劫火闢通衢

沈公井巷可通脩義坊者宋嘉祐中郡守沈文通
于六井之南引湖水絕河東至美俗坊爲六井

守

名曰南井宋熙寧間井廢郡首陳述古疏湧金
池爲上中下澣衣洗馬者不得及上池列二牖
于門外其一赴三池而決之河其一納之石檻
比竹爲五筒以引之苾河而東絕三橋入于石
溝注于南井元祐間復廢民率以七八錢買水
一斛蘇子瞻復命僧子珪治之以瓦筒易盛以
石槽疏請名惠遷從子珪之號也傍有奉慶院
嘉泰元年僧智師建又有小悟空寺後俱廢近
里人趙鳴鸞捐貲復其井併建奉慶院
大瓦巷北通保康巷元時詩婦朱淑真居此

石樞園巷通張司馬巷 國初有鎮撫司

三橋街東通文錦坊西至湧金門北通剪刀街南

過惠遷橋

自羲和坊而東至肅羲街過芳潤橋其街之南為鐵

線巷會寧巷豐樂橋忠孝巷雙井巷安福巷北為固

寧巷興忠巷安平巷馬市巷昇平巷南班巷

芳潤橋俗呼炭橋宋時為藥市又北為書坊沿河

而南為善履坊

會寧巷即柴木巷宋時有柴木場于此通薦橋上

中沙巷

豐樂橋宋有豐樂樓酒肆其北有橋園亭宋時此

地多樹橋號橋園高宗幸建康于此登舟作亭

臨河故稱橋園亭也亭傍有夏皇后宅十少保

府其南為狗兒山隱隱地中無可登陟其東有

常惠井橋之上有華光廟其北有青字營

忠孝巷舊名中沙巷

固寧巷內小巷曰諸投巷相傳宋時行市各有分

地而此巷獨無禁厲其北為油局橋宋時為油

蠟局

馬市巷宋時為馬市于此東北通南班巷茅郎巷



昇平巷今爲皮市內有上四眼井下四眼井至陽庵

南班巷宋時宗室子列南班奉朝請者居之

自壽安坊而西至井亭橋其街之南爲二僊巷興德巷八僊巷鐵作巷成娘娘巷北爲花市巷馬家營巷新房廊巷

二僊巷元時詩人張光弼居之胡虛白挽詩云二

僊坊裏張員外頭白相逢只論詩今日過門人不見小樓春雨燕歸遲

興德巷南通神堂巷

八僊巷宋有八僊茶坊其時茶坊之有名者曰八

僊曰清樂曰珠子曰潘家曰連二曰連三坊中

插四時花卉名人圖畫糕點店面所賣有七寶

擂茶餛子葱茶或賣鹽豉湯暑天則賣雪泡梅

花酒或縮脾飲之屬孟杓蓋子皆以銀爲之亦

司酒肆論一角二角茶樓多富室子弟諸司下

直人等會聚習學樂器上教曲賺之類謂之掛

牌兒人情

鐵作巷西連百子圖巷

成娘娘巷宋時皇后無成姓亦無賜宅于花市者

俗云神娘娘巷豈訛而爲成歟

花市巷宋時作鬻花者居之今壽安坊兩岸多
賣花之家亦其遺俗也

馬家營巷錢王屯軍之所北通修文坊

自井亭橋而西爲甘泉坊相國井

甘泉坊與井亭橋對相國井有二皆唐鄴侯李公
泌所鑿也自江湖避錢唐而擊西陵沮如鹵斥
化爲平原今之城市聚落皆江流故地也其水
苦惡惟負山鑿井乃得甘泉而所及不廣唐宰
相李泌當德宗興元時守杭州始作六井引湖


水以濟民其最大者在古清河爲相國井其西
爲西井又名化成井少西而北爲金牛池又北
而西附城爲方井爲白龜池又北而東至錢唐
縣舊治之南爲小方井金牛之廢久矣出湧金
門並湖而北有水腫二注以石溝貫城而東者
相國方井之所從出也若西井則相國之別派
也而白龜池小方井皆爲匿溝湖底無所用牖
此六井之大畧也長慶間白居易續鄴侯之績
而浚浚之民以爲利宋熙寧間六井皆廢民苦
遠汲郡守陳述古命僧仲文子珪等董其事發

溝易甃補苴罅隙而相國之水清冽溢流千艘更載而留之元祐五年蘇軾復引六井餘波至威果雄武五營之間創爲二井乾道三年轉運周琮重加浚治淳祐七年安撫趙與憲自湧金門北至錢唐門水口所入咸作石櫺禁民不得植菱荷以穢水咸淳間內侍陳敏賢築室于靈芝寺前劉公正于相國祠前洗馬御史鮑度劾之遂皆奪職自宋迄今將三百年曠廢不理惟相國井西井僅存而城中之井無慮數萬餘未必全賴六井也唐宋守臣遙相修浚旋復壅塞

竭

蓋延引紆遠則筒槽崩裂而相國西井至今不
竭者蓋有自然之源不係于水口之修不修也
父老言大旱若宋淳祐間西湖龜拆六井斷流
獨吳山大井日下萬緡遠近賴之蓋自宋以前
城市地脉猶帶江滋故多苦惡迨今去江日久
土膏融液霖雨滲漉鹵斥全消淳釀其淡凡井
皆良故六井之利不顯當鄴侯時民之仰賴者
豈可同日語哉○過井亭橋而西宋有俞家園
諸天閣華嚴院鶴林宮激賞庫卿監郎官宅○
俞家園在宋初皆荒池汚畝莠稻雜植行潦所

歸故諺云俞家園一雨便撐船自為行都而閭閻輻輳遂成平原其南有九官宅○諸天閣華嚴院晉天福間建尋燬宋紹興三年重建丞相梁克家手書華嚴經一部建輪藏仍作亭于相國井上元末燬○鶴林宮宋慶元間旱道士劉友真者禱雨而應遂請以所寓舍崇奉天將賜額曰鶴林○激賞錢庫以供三省樞密院公用者庫西為小方井其激賞酒庫在錢唐縣南自泰和坊而北至井亭橋其河之東為普濟橋侍郎橋軍將橋施水坊橋河之西為油車巷由阜橋欽



坊

普濟橋上有華光廟俗稱斷河頭合湧金之水過惠遷橋軍將橋施水坊橋井亭橋洪福橋鞞鼓橋馬家橋八字橋石湖橋結縛橋折而東過衆樂橋衆安橋度生橋與市河合宋咸淳六年安撫潛說友因斷河堙塞開至清湖橋凡四千二百一十丈
侍郎橋宋真宗時工部侍郎簡所居簡字叔廉性和易喜賓客治園廬以時花木導引服餌顏如渥丹善醫術至老不衰郡守孫沔表其里曰

仁壽坊

軍將橋宋有茉莉園

油車巷之西宋有度牒庫德壽橋今廢入織染局
曲阜橋在靈壽寺坊前宋有韓樞密府

欽善坊舊名聞善子巷宋有柴場

自井亭橋而北過甘泉坊至清湖橋其街之東爲洪
福橋鞞鼓橋馬家橋西爲鮑生姜巷清風坊清河坊
癸辛街

洪福橋之對宋有紫雲坊東有樞密五房院西有
惠利井又名王蓮池引湖水以入城者水口在

舊王蓮堂基北有楊和王府第王名存中本名
沂中字正甫紹興間賜名存中代州崞縣人從
高宗南渡累立戰功封和義郡王高宗假借諸
將而眷存中尤深第當清湖洪福兩橋之間規
制甚廣自居其中旁列子舍皆極宏麗落成之
日縱人遊觀一僧善相宅云此龜形也得水則
吉時和王方祓殊眷從容爲上言之欲引湖水
以環其居高宗首肯曰朕無不可第恐外庭有
言宜密速爲之和王即督濠寨兵且募民夫晝
夜作陰道引水入自五房院出自惠利井蜿蜒

縈遶數百丈再宿訖事未幾臺臣有䟽言擅濯湖水私第以象宮禁者上曉之曰朕南渡初群盜蜂起用羈縻策刻印封之所有淮淝數郡賴諸將宣力群盜悉平朕籍土地外府庫金帛俱置不問故諸將有餘貲以治泉池第園以存申之功雖盡賜西湖曾不爲過況此役已成願卿等容之言者遂止既復建傑閣藏思陵御劄以御書風雲慶會四字扁之蓋取大龜俯首下視西湖之象以成僧說自此百餘年間無火災紹定間其家捨閣于佑聖觀相者謂龜失其首次

年五月大火潭潭數百楹不數刻而燼云

鞞鼓橋之對宋有崇訓坊

馬家橋之對宋有孝慈坊

清風坊宋稱活水巷有莊文太子府

清河坊宋稱古清河坊

癸辛街相傳楊和王建子第於府側取癸辛方向其門巷曰癸辛街宋季有有周密公謹居此所著有癸辛雜識齊東野語元時有省府廣濟庫洪武初賜爲曹國公李文忠宅永樂間籍于官今爲民居

西湖遊覽志卷之十三
清湖橋與洗麩橋分跨兩河若八字然故名八字橋其水過安濟橋安福橋丁家橋長生老人橋紀家橋車橋長壽橋新莊橋師姑橋中正橋出城外

西湖遊覽志第十三卷終

西湖遊覽志第十四卷

錢唐田 汝成 輯撰

南山分脉城內勝蹟

衢巷河橋

入湧金門而東至三橋街其街之南為湧金池轉運橋永安橋惠遷橋北為鑪子井友助巷焦鷄巷六房巷

湧金池吳越王時金華令曹杲所鑿也楊蟠詩湧金春色晚吹落碧桃花一片何人得流經十萬家郭祥正詩衆沼皆酒壑斯池獨湧金寶光終